



AN COIMISIÚN
EORPACH

An Bhruiséil, 24.6.2025
COM(2025) 342 final

2025/0187 (NLE)

Togra le haghaidh

CINNEADH CUR CHUN FEIDHME ÓN gCOMHAIRLE

**lena nÚdaraítear Tacaíocht ó Chúltaca Cibearshlándála an Aontais le haghaidh
Moldóive**

(Téacs atá ábhartha maidir le LEE)

Togra le haghaidh

CINNEADH CUR CHUN FEIDHME ÓN gCOMHAIRLE

**lena nÚdaraítear Tacaíocht ó Chúltaca Cibearshlándála an Aontais le haghaidh
Moldóive**

(Téacs atá ábhartha maidir le LEE)

TÁ COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh,

Ag féachaint do Rialachán (AE) 2025/38 ó Pharlaimint na hEorpa agus ón gComhairle an 19 Nollaig 2024 lena leagtar síos bearta chun dlúthpháirtíocht agus acmhainneachtaí a neartú san Aontas chun cibearbhagairtí agus cibirtheagmhais a bhrath agus chun ullmhú dóibh agus freagairt orthu agus lena leasaítear Rialachán (AE) 2021/694 (An Gníomh um Chibear-Dhlúthpháirtíocht)¹, agus go háirithe Airteagal 19 (4) de,

Ag féachaint don togra ón gCoimisiún Eorpach,

De bharr an mhéid seo a leanas:

- (1) Sna conclúidí uaithi an 15 Nollaig 2022, dhearbhaigh an Chomhairle Eorpach go leanfaidh an tAontas de gach tacaíocht ábhartha a thabhairt do Phoblacht na Moldóive (dá ngairtear an Mholdóiv anseo feasta) agus í ag déileáil leis an tionchar ilghnéitheach atá ag cogadh foghach na Rúise in aghaidh na hÚcráine.
- (2) An 23 Meitheamh 2022, dheonaigh an Chomhairle Eorpach stádas tír is iarrthóir don Mholdóiv. Bhí an cinneadh bunaithe ar chomhlíonadh na gcoinníollacha ag an Moldóiv, ar coinníollacha iad a shonraítear sa tuairim ón gCoimisiún i mí an Mheithimh 2022 maidir le hiarratas na Moldóive ar bhallraíocht. An 14 Nollaig 2023, chinn an Chomhairle Eorpach tús a chur leis an gcaibidlíocht aontachais leis an Moldóiv, tar éis an mholta a d'eisigh an Coimisiún.
- (3) Tá tionchar eacnamaíoch agus sochaíoch ag cibirtheagmhais ar fud an Aontais agus ar an leibhéal domhanda i gcónaí. Tá na cibearbhagairtí ag forbairt go han-tapa i roinnt tíortha is iarrthóirí an Aontais, inar féidir le teagmhais fhéideartha shuntasacha nó mhórsála cur as do agus dochar a dhéanamh do bhonneagar criticiúil, cur isteach ar fheidhmiú ceart a gheilleagair agus a institiúidí nó rioscaí dáiríre a bheith ag gabháil leo do shlándáil agus sábháilteacht phoiblí na n-eintiteas nó na saoránach. Is amhlaidh atá go háirithe sa Mholdóiv, áit a bhfuil an Rúis i mbun feachtais hibrídeacha agus cibirionsaithe chun bonneagar criticiúil, próisis dhaonlathacha agus bonneagar toghcháin a chur i mbaol.

¹ IO L 38/2025, 15.1.2025, ELI: <http://data.europa.eu/eli/reg/2025/38/oj>.

- (4) Agus cineál dothuartha ionsaithe cibearshlándála á chur san áireamh, agus ós rud é gur minic nach gcoinnítear i limistéar geografach sonrach iad agus go bhfuil riosca ard iarmharta ag baint leo, rannchuidítear leis an Aontas, ina iomláine, a chosaint, agus go háirithe a mhargadh inmheánach agus a thionsclaíocht, le neartú athléimneacht na dtíortha comharsanachta agus a n-acmhainneachta freagairt go héifeachtach do theagmhais shuntasacha cibearshlándála ar mhórsála. Dá bhrí sin, le Rialachán (AE) 2025/38, foráiltear gur féidir tacú le tríú tíortha atá comhlachaithe leis an gClár don Eoraip Dhigiteach (DIGITAL) ('CED') ó Chúltaca Cibearshlándála an Aontais (an 'Cúltaca'), ina gcríocha uile nó i gcuid dá gcríocha, sa chás go ndéantar foráil maidir leis an méid sin sa chomhaontú trína bhfuil an tríú tír comhlachaithe le CED.
- (5) Mar a fhoráiltear in Airteagal 19 de Rialachán (AE) 2025/38, ba cheart do thríú tíortha atá comhlachaithe le CED a bheith in ann an tseirbhís a iarraidh ón gCúltaca nuair is eintitis a oibríonn in earnálacha ardchriticiúlachta nó eintitis a oibríonn in earnálacha criticiúla eile iad na heintitis ar a ndírítear agus a bhfuil tacaíocht á iarraidh acu ina leith ón gCúltaca agus nuair a bhíonn suaitheadh oibríochtúil suntasach mar thoradh ar na teagmhais a bhraitear nó nuair a d'fhéadfadh éifeachtaí iarmharta a bheith acu san Aontas. Níor cheart do thríú tíortha atá comhlachaithe le CED a bheith incháilithe chun tacaíocht a fháil ach amháin i gcás ina ndéantar foráil shonrach maidir le tacaíocht den sórt sin sa chomhaontú trína bhfuil siad comhlachaithe le CED. Ina theannta sin, níor cheart do na tríú tíortha sin a bheith incháilithe ach amháin fad a chomhlíontar trí chritéar. Ar an gcéad dul síos, ba cheart don tríú tír téarmaí ábhartha an chomhaontaithe sin a chomhlíonadh go hiomlán. Ar an dara dul síos, i bhfianaise chineál comhlántach an Chúltaca, ba cheart bearta leormhaithe a bheith déanta ag an tríú tír chun ullmhú le haghaidh teagmhais shuntasacha cibearshlándála nó teagmhais cibearshlándála choibhéiseacha ar mhórsála. Ar an tríú dul síos, ba cheart soláthar na tacaíochta as an gCúltaca a bheith comhsheasmhach le beartas an Aontais i leith na tíre sin agus leis an gcaidreamh foriomlán léi agus le beartais eile an Aontais i réimse na slándála.
- (6) Féadfaidh soláthar na tacaíochta do thríú tíortha atá comhlachaithe le CED difear a dhéanamh don chaidreamh le tríú tíortha agus do bheartas slándála an Aontais, lena n-áirítear i gcomhthéacs an Chomhbheartais Eachtraigh agus Slándála agus an Chomhbheartais Slándála agus Cosanta. Dá réir sin, le hAirteagal 19(4) de Rialachán (AE) 2025/38 ceadaítear an tréimhse ama a shonrú sa ghníomh cur chun feidhme ón gComhairle, nár cheart a bheith níos lú ná 75 lá le haghaidh aon iarrata amháin, inar féidir an tacaíocht sin a sholáthar. Ba cheart don Chomhairle gníomhú ar bhonn togra ón gCoimisiún, agus aird chuí á tabhairt ar mheasúnú an Choimisiúin ar na trí chritéar.
- (7) Tá difear mór á dhéanamh don Mholdóiv le cogadh foghach na Rúise in aghaidh na hÚcráine, agus dírithear gníomhaíochtaí hibrídeacha na Rúise go díreach uirthi an tráth céanna, chun an tír a dhíchobhsú agus dochar a dhéanamh dá conair isteach san Aontas. I bhfianaise an mhéid sin, sholáthair an tAontas tacaíocht chuimsitheach don Mholdóiv maidir le haghaidh a thabhairt ar na dúshláin atá roimpi de dheasca chogadh fhoghach na Rúise in aghaidh na hÚcráine, agus chun athléimneacht, slándáil agus cobhsaíocht na tíre a neartú d'ainneoin gníomhaíochtaí dhíreacha dhíchobhsaithe na Rúise.
- (8) An 24 Aibreán 2023, d'fhorghas an Chomhairle bunú Mhisean Comhpháirtíochta an Aontais Eorpaigh sa Mholdóiv faoin gComhbheartas Slándála agus Cosanta chun comhairle straitéiseach agus tacaíocht oibríochtúil a sholáthar i réimsí na bainistíochta géarchéime agus an chomhraic in aghaidh bagairtí hibrídeacha. Ó bhí 2021 ann,

sholáthair an tAontas Eorpach tacaíocht leanúnach tríd an tSaoráid Eorpach Síochána chun acmhainneachtaí na Moldóive sa réimse míleata agus cosanta a neartú. Le síniú na Comhpháirtíochta Slándála agus Cosanta idir an tAontas Eorpach agus an Mholdóiv an 21 Bealtaine 2024, rinneadh cuíchóiriú ar struchtúr chomhair an Aontais leis an Moldóiv i bpríomhréimsí na síochána, na slándála agus na cosanta. Thairis sin, is é is aidhm don Phlean Fáis don Mholdóiv, arna ghlacadh ag an gCoimisiún an 10 Deireadh Fómhair 2024, tacú le leasuithe socheacnamaíocha na Moldóive agus a rochtain ar mhargadh aonair an Aontais a fheabhsú, agus measfar go mbeidh athchóirithe sonracha ann i réimse an rialachais chibearshlándála.

- (9) Rinne an Coimisiún measúnú ar na trí chritéar a leagtar amach in Airteagal 19(3) de Rialachán (AE) 2025/38 maidir leis an Moldóiv agus meastar gur comhlíonadh iad. Chuaigh sé i gcomhairle freisin le hArdionadaí an Aontais do Ghnóthaí Eachtracha agus don Bheartas Slándála agus an measúnú seo á dhéanamh,

TAR ÉIS AN CINNEADH SEO A GHLACADH:

Airteagal 1

Leis seo, údaraítear soláthar na tacaíochta ó Chúltaca Cibearshlándála an Aontais do Phoblacht na Moldóive de réir bhrí Airteagal 19 de Rialachán (AE) 2025/38 i gcomhréir leis an togra ón gCoimisiún, arna chur isteach i gcomhréir le hAirteagal 19(3) de Rialachán (AE) 2025/38.

Airteagal 2

Tiocfaidh an Cinneadh seo i bhfeidhm ar dháta a ghlactha agus beidh feidhm aige ar feadh bliain amháin ar a mhéid.

Arna dhéanamh sa Bhruiséil,

*Thar ceann na Comhairle
An tUachtarán*